



**BASLER
BEBBI
BASEL**

Junge Garde

Sujet 2009: Dr Fyyrdeyfel goht um!

(In Aaläänig an Muni Watter)

**Kennsch du das Liedli
vom Helzli wo brennt?
S isch zerscht e glai Flämmli
am Helzli, wo brennt!**

Glepfer breetle, Schmineefyyr,
brennt di Hytte, no wird's dyyr,
Gugge rauche, Zigi schlote,
bi Autibrand stiggst lischaltquote,
mit Gluet bim Ummetschille grille
am Rhyybord lige, d Knille fille,
Container ohni Fyyr, wie faad,
wenn's brennt, nit lesche!
S wär doch schaad!
E Miggi, gstaylt im Esprittfummel,
spiggt gekonnt e Goluuasstummel
in Babiirkorb. S fangt a stingge,
und s Miggeli glopft d Stinggfingge.
Es brenne Schepf, es brenne Schyyre,
me waisses nit, wär do duet fyyre.
So lang und gnysslig d Flämmli stiige:
Als Fyyrweehrmaa kunnsch kuum zem Liige.
Im Winter singsch zur Wiehnachtszytt,
(Die hail....ssi Zytt isch nimme witt!)
s Adväntslid, wo e jede kennt:
«Freut euch! Dr erscht Adväntsgranz brennt.»
Bim Reedli — schwinge in Biel-Bängge,
derfsch zynserle oohni Bedängge,
Fir Lieschtel sinn d Chienbääsewääge,
e fyyrig-gliehig-haisse Sääge:
Es drifft im Stedtli d Stadt uff s Land
Und gaffe g'aint und mitenand
s Inferno, und hejoo dernoo,
düe si für aimoll zääme stoh!

**Kennsch du das Liedli
vom Helzli, wo brennt?
S wird greesser das Flämmli
am Helzli, wo brennt.**

Isch Fyyr im Dach, haisst's: Heggschti Zytt!
Fyyr ha im Fiidle, sait, sigsch fit.
Hetts Blatt am Epfelbaum e Flägg,
Hilfe! Fyyrbrand! Flägg ewägg!
Dr ganzi Baum wird sofort killt,
verbrennt.... dasch Stoff wo d Brässi fillt.
Dass wo Rauch isch, Fyyr muess si,
merggt dr Schmid bim Nef zwor glii,
doch losst är s motte bis zem Brenne,
statt z lesche und mer kenne denne
was d Folg dervo, was s Fazit isch:
Zwai Äschehyffeli underem Disch! —
Dr Busch — brand kennsch vo Afrika.
Doch dä kasch au im Irak ha,
z Afganischtan, im Noche Oschte
iiberall kas, gosch go boschte,
si, dass de bletzlig brenne duesch,
hesch Gligg, blibsch lääbe, denne muesch
seggeln um dr näggscht bescht Rangg!
Blibsch lääbe, dänggsch: Ooh! Bush sei Dangg!

**Kennsch du das Liedli
vom Helzli wo brennt?
Jetzt isch es Flamme!
S Helzli verbrennt!**

Fir uns isch glaar, mir wänn nur Ains,
e Fyyr zwor au, doch ischs e kains,
wo kaputt macht, duet zersteere.
Mir dien is do dergeege weere.
S isch s Fyyr in unsrem Fasnachtshärz,
wo loderet, brennt, ganz oohni Schmärz!
Mir schyyre d Gluet, drei kurzi Dääg.
Kumm mit is, mach di uffe Wääg!
Drampsch mit is, loosisch, wirdsch s begriffe:
Wenn mir dr «Brand»-e-burger piffe.



Basler Bebbi Basel
E Pfyffer- und Drummelschuel fir Buebe

Jungs ab 7 Jahre können sich am
Samstag, 14. März, 14.00 Uhr
im Bebbi-Keller im Luftgässlein für die Pfeifer-
und Trommelschule anmelden. Weitere
Informationen erhalten Sie vom
Obmann der Jungen Garde, Oliver Viani,
Telefon 061 303 90 28 oder auf
www.baslerbebbi.ch